

Headline	Jangan sampai tapir tinggal nama sahaja		
MediaTitle	Utusan Malaysia		
Date	27 Apr 2016	Color	Black/white
Section	Dlm Negeri	Circulation	171,663
Page No	12	Readership	563,000
Language	Malay	ArticleSize	251 cm ²
Journalist	N/A	AdValue	RM 3,271
Frequency	Daily	PR Value	RM 9,812



Jangan sampai tapir tinggal nama sahaja

JIIKA dilihat dalam peta satelit Google, Taman Botani Negara Shah Alam (TBNSA) yang terletak dalam hutan simpan Bukit Cerakah umpama sebuah pulau di tengah-tengah hutan konkrit. Pembangunan pesat di Bukit Jelutong, Seksyen 8, Setia Alam, Meru, Puncak Alam dan Bukit Bandaraya di sekelilingnya menjadikan TBNSA yang seluas 817 hektar hanya tompokan kecil berwarna hijau dalam peta berkenaan.

Maka tidak hairanlah akibat diasak dengan bermacam-macam projek pembangunan, pelbagai kehidupan flora dan fauna serta spesies haiwan di dalamnya turut terancam. Antaranya, Tapir Malaya, iaitu spesies tapir terbesar di dunia yang dilindungi di bawah Akta Pemuliharaan Hidupan Liar 2010. Memang mengejutkan apabila diberitahu kini hanya tinggal dua ekor Tapir Malaya mendiami Bukit Cerakah yang menjadi habitat haiwan itu.

Jumlahnya kian berkurangan kerana haiwan pemalu itu terdesak untuk mencari makanan hingga terpaksa menyebarkan jalan besar yang sibuk untuk ke kawasan lain terutama Puncak Alam menyebabkan ada yang mati dilanggar kenderaan. Berdasarkan statistik antara 2005 dan 2013, sebanyak empat ekor tapir mati dilanggar di lokasi sama di Persiaran Mokhtar Dahari (dahulu Jalan Batu Arang-Puncak Alam).

Selain itu, stres yang dialami oleh haiwan berkenaan kerana habitatnya diganggu turut merencatkan proses pembiakkannya. Tapir Malaya yang mempunyai nama lain seperti Badak Lampung, Tenuk serta Cipan adalah paling besar antara empat spesies tapir yang ada di dunia. Selain Malaysia, ia juga hidup di Kembboja, Thailand dan utara Sumatera.

Tapir Malaya mudah dikenali berdasarkan corak warna hitam putih yang amat berguna sebagai penyamaran daripada musuh. Menyedari ancaman kepupusan Tapir Malaya semakin serius, TBNSA buat pertama kalinya mengajurkan kempen *#SayangMyTapir* sehingga 24 April ini bertujuan mendidik orang ramai terutama generasi muda untuk lebih mengenali haiwan berkenaan. Pengajuran kempen tersebut juga sempena Hari Tapir Sedunia yang disambut pada 27 April setiap tahun.

Bagi Pengarah TBNSA, Mohamad Gaddafi Denis, isu Tapir Malaya yang kian diancam kepupusan seharusnya membuka mata semua pihak tentang kepentingan segala khazanah

alam dalam taman botani itu dipelihara.

Menurutnya, penduduk bandar raya Shah Alam sepatutnya bersyukur kerana masih terdapat kehijauan semula jadi yang luas bersebelahan kediaman mereka.

"Penduduk Shah Alam beruntung kerana masih ada hutan. Untuk ke sini dari Bangunan Setiausaha Kerajaan Negeri (SUK), Masjid Sultan Salahuddin Abdul Aziz Shah dan taman tema i-City cuma lima minit memandu. Kalau tiada TBNSA, hutan mana lagi yang nak bekalkan oksigen? Paling dekat Hutan Simpan Ayer Hitam berhampiran Universiti Putra Malaysia (UPM) Serdang atau Hutan Simpan Kuala Kubu Bharu. Di Shah Alam juga banyak kilang yang melepaskan asap se kali gus mencemarkan udara. Hutan mana lagi yang nak serap gas-gas beracun itu kalau bukan taman botani ini?" soalnya.

Selain itu, TBNSA juga adalah kawasan tадahan air yang mana terdapat Empangan Sungai Baru, Empangan Air Kuning dan kolam-kolam perikanan sekali gus membantu menghalang Shah Alam daripada berdepan banjir besar. Di situ turut terdapat beberapa kelompok hutan dara yang sememangnya sukar lagi dijumpai di Selangor.

Hutan yang belum lagi diterokai itu dalam tempoh kira-kira 50 tahun akan datang bakal menjadi hutan matang dan sewajarnya ia dikekalkan dalam bentuk sedemikian.

Mohamad Gaddafi menambah, meskipun terdapat taman-taman botani lain di negara ini, TBNSA adalah satu-satunya yang ada hutan semula jadi.

"Sebagai contoh, Tasik Perdana di ibu negara sebenarnya ditarah dan pokok-pokoknya ditanam. Tapak hutan di **Institut Penyelidikan Perhutanan Malaysia (FRIM)**, Kepong adalah bekas lombong. Begitu juga Taman Botani Putrajaya adalah hutan buatan manusia. Berbeza dengan TBNSA, 85 peratus kawasan keseluruhannya diliputi hutan semula jadi," ujarnya.

Sememangnya, warga Shah Alam amat beruntung kerana tidak perlu pergi hingga ke Taman Negara untuk menikmati keindahan serta keunikan hutan hujan tropika. Semua itu boleh didapati di sebelah rumah mereka sahaja. Sewajarnya TBNSA dihargai supaya dapat terus berfungsi sebagai parupu hijau untuk Lembah Klang. Janganlah sampai cucu-cicit kita nanti sudah tidak kenal lagi rupa tapir.